



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail: tiryimiyim@gmail.com

TAPAK 8

Yangia anidakangma :

f Tir Yimiyim

ig tir_yimiyim

yt tir yimiyim

TAPAK 7



Louise Eta Bundesliga nung mezüngbuba tetsür head coach kümogo



Australia PM Albanese-i Brunei aser Malaysia semdangtsü

VOL. XXIII ISSUE NO. 179 (ADOK 179) DIMAPUR TENTONÜ (MONDAY) RONGCHII (APRIL) 13, 2026

₹ 5.00

Parliament special session nung Women reservation bill jembitsü

New Delhi, April 12, 2026

(Agencies): Centre sorkari Parliament budget session anogo asemnü talila agitsü metetdaksüogo aser iba ya Nari Shakti Vandan Adhiniyam (Women's Empowerment Act) Amendment Bill mapa tenzüksü asoshi lir.

2029 nung taruba Lok Sabha elections matongdang women's quota law mapa tenzüksü nükjijong nung April 16 nungi 18 tashi anogo asemnü special session alitsü.

Constitution indang original amendment ya 2023 nung agizüka liasü saka delimitation asüba aser census maparen tembangba sülen ang reservation exercise agitsü telemtetba liasü. Iba amaji inyakra 2027 census sülen ang Women's Empowerment Act Amendment Bill mapa tenzükra 2034 nungiang mapa akümtsü.

Anogo asemnü session nung Centre sorkari 2011 census nung ajemdaker bill tenzüksü merangtsü sentong lir.

Iba ajanga 2027 census metembangdang Lok Sabha aser state assemblies nung tetsür asoshi 33 lezmüksü temelaba agütsütsü.

Iba bill nungsa Lok Sabha menden 816 akümtsü aser iba nungi tetsür nem 273 lezmüksütsü shia lir.

Iba bill agizükra reservation

mapa mezüng benoktsübaji Uttar Pradesh, Punjab, Gujarat aser Uttarakhand elections nung asütsü.

Iba bill ya constitutional amendment ka lir aser iba jagi special majority ka nüngdaker. House nung züngsem ajunga nungi majority aser session nung adenba züngsem asemnü nungi anasü nüngdaker.

Prime Minister Narendra Modi-i political party tem dang reservation quota mapa tenzüksü atema yaritsü ayongzükogo saka Congress-i anir Opposition ajanga NDA-i kanga dang aritepa iba bill agizüktsü merangba atema ashishir.

State pezü nung elections agitsü aliba nung jenjang tajung yanglutsü atema Centre-i iba maparen inyaksü ariteper ta Congress president Mallikarjun Kharge-i PM Modi dangi shidi ka zülüogo.

Iba bill ya 2023 nung ajaki mulunga agizük saka Centre-i mapa meinyaki atatsü lemtet aser tang Opposition dang masüngdangtepi session alitsü jateper ta Kharge-isa ashi.

Bharatiya Janata Party (BJP)-i MP ajak asoshi whip ka agütsüogo. Iba kübok BJP MP ajak April 16 nungi 18 tashi special session nung adentsü aser women's reservation bill agizükba nung shilem agitsü tetuyuba lir.

China-i tenüng jaloktsüba magizüker: India

New Delhi, April 12, 2026

(Agencies): China-i India lushi nung aliba tesem kar nem tenüng kar jaloktsütsü merangba aitsür ta Ministry of External Affairs (MEA)-i metetdaksüogo.

Afghanistan, Arunachal Pradesh, aser Pakistan-occupied Kashmir (PoK) arrtsülen anasa Xinjiang province nung county tasen ka amenokogo ta China-i osang kar prokshiba atema MEA-i iba ya ashi.

"China-i India lushi nung tesem kar nem par tenüng agütsütsü merangba magizüker" ta MEA spokesperson Randhir Jaiswal-i ashi.

Kuli kecha maliba inyakym ajanga item tesemtem jenjang mekongshitsü aser maneni India kübok tongti shilem asütsü ta Jaiswal-i ashi.

Afghanistan aser PoK arrtsü anasa aliba Xinjiang province nung China-i 'Cenling' ta ser county tasen ka amenok. Iba ya

Karakoram mountain range anasa lir aser China-i küm ka tsüngda Xinjiang nung county tasembuba tentetogo. Iba tesem ya Muslim Uyghur region lir.

India-isa yaküm China den Hean aser Hekang counties tentetba anema shidi zülüa liasü kechiyong item tesem ya Union territory of Ladakh telongtet nung lir.

March 26 nü Xinjiang Uyghur Autonomous Region government-i 'Cenling' tentetba osang metetdakja liasü. Parnoki iba county indang administrative divisions aser arrtsü tejangja memetdaksü saka Kashgar prefecture ajanga ketdangtsütsü ta shiogo.

Kashgar ya alemli Silk Road nung lir aser iba ya China-i South o Central Asia den sendaktepba tongti lenmang ka lir. Iba ya China-Pakistan Economic Corridor (CPEC) tetenzükdak lir aser PoK ajanga süir saka India-i iba lenmang magizüker.

Assam Civil Society aser journalists-i ola adoker

Guwahati, April 12, 2026

(Agencies): Assam assembly elections agiba sülen media aser opposition anema jembiba aser inyaksangshiba atema süoki ia bilemer ta Assam Civil Society (ACS)-i metetdaksüogo.

Chief Minister Himanta Biswa Sarma-i media aser opposition candidate kar dak tenük yoka o jembiba aitsür aser iba ya Assam aser linük nung democratic tangatetba aser inyaksangshi anema lir ta ACS-i sangdong ka nung ashi.

Külen, Election Commission of India-ia maparen inyakba nung ashishiteper kechiyong parnoki külen tsütsü shir inyakba sayur. Election mapang state sorkar ya ECI telatetba kübok inyaksangshir saka opposition candidates nem timtem agütsüba aser mesenmetua amshiba ajanga ECI ya shinga tsütsü mashiba telok ka masü ama public-i tebilemtsü abener ta ACS-isa ashi.

Lurinjyoti Gogoi aser Kunki Chowdhury amala opposition lennirtem anema ken o tem benoka lir aser iba ajanga parnok timtem kanga ajurur. Election nung tim masüba atema Chowdhury anema ken o benoker mapa inyaker saka külen

lai benokba ken o tem atemabo mapa kecha meinyaker ta ACS-isa metetdaksüogo.

Chief Minister Sarma-i Asomiya Pratidin aser DY365 dena media house kar anema o tamajung jembiba den digital news platforms aser Chowdhury'er kinungertem anema jembiba aitsür ta Assam Civil Society-isa ashi.

Chief Minister-i ibala o mejembitsüla aser maparen meinyaksüla aser democratic tangatetba nung noktaksüla. Kasa mapang opposition party tem aser parnok pusemertemia election tembangba sülen tensa süngjema alitsü atema kümdanga alitsü aser ken o kecha memenatsü mepishir ta ACS-isa metetdaksüogo.

Tawa Assam Assembly elections mapang media anema mapa inyakba atema süoki ia bilemer ta Deobamü Guwahati nung journalist temi metetdaksüogo.

Gauhati Press Club nung lungkak aitba sentong ka agidang media professionals 150 shi aden. Parnoki President Droupadi Murmu, Prime Minister Narendra Modi, aser Election Commission of India dangi memorandums yoktsü telemtetba agiogo.

Pai maneni takok ngura media groups ana samatsütsü ta Assam Chief Minister Himanta Biswa Sarma-i jembiba atema tebilemtsü abener ta journalist temi ashi.

April 9 nü polling tembangba sülen Assamese daily Asomiya Pratidin indang North Lakhimpur office amakba atema parnokisa tebilemba abenba lemsatop.

Ibala inyakym ajanga press dak "systematic attack" sayur aser electoral process nung media freedom kümzüka ayutsü nüngdaker ta Gauhati nung journalists-isa metetdaksüogo.

Parnokisa retired judges, legal experts, aser civil society züngsemtem adenba independent media commission ka tentetsü aser iba teloki press security aser freedom dak sendakba maparen inyaksü takhangba agütsüogo.

Gauhati Press Club-isa Assam nung press clubs-i iba mesükba lungkak aitba sentongtem ayonga agitsü aser külemi rongshitsü ayongzükogo.

Parnokisa Press Council of India, Ministry of Information and Broadcasting, Assam Chief Secretary, aser Director General of Police nung dangi shiditem zülutsü.

Bishnupur lendong atema valley district nung lungkak aiter



April 12, 2026 nü Uripok Apunba Lup-i Imphal West nung lungkak aitba sentong ayonga agidang tanurtemia shilem agiba angur.

Imphal, April 12, 2026

(Agencies): Bishnupur district nung bomb lendong ka nung tanur ana tepsetba atema nübertemi temeten meshia lungkak aityonga arur aser Deobarnüa valley districts aika nung sentongtem agiogo.

Ketdangtsürtemi Deobarnü curfew talenba salatsüba ajanga telok balalai lungkak aitba sentongtem ayonga agia liasü.

Imphal West nung Uripok Apunba Lup ajanga sentong ayongzük agi. Iba sentong nung

tanurtemia shilem agi aser parnoki

Lambui Khongnangkhang nungi Bazar Overbridge tashi jaja.

Imphal East nunga lungkak aitba sentong ka nung nisung meyrjang aikati shilem agia liasü.

Lungkak aitertemi aibelentem aputsü aser jungjunga bushisüngdang asütsü takhangba agütsüogo.

Imphal East, Imphal West, aser Bishnupur district magistrates-i anepdang 5:00 ako nungi nikongdang 3:00 ako tashi curfew

salatsü. Ajisüaka nikongdang 3:00 ako nungi anepdang 5:00 ako tashi curfew maneni alitsü.

Otem tenokdangba kübok healthcare, electricity, water supply, banking, media, aser telecommunications ama essential services maden ta ketdangtsürtemi metetdaksüogo.

Bishnupur district kübok Tronglaobi area nung mortar shell apokdang tanur ka tepsetba sülen nübertem lungkak aitba manener. Iba lendong nungsa nisung 25 shi yirua liasü.

Aotsür mezüing graduate asüla Chubala otsü kaket saya



Er. Lanu Toy-i Chubala taküm otsü kaket tezülur Wb. I. T. Longkumer nokdaka lia sayatsüba noksa nung angur.

Dimapur, 12 (TYO) : Aotsür rongnung mezüing graduate aser post graduate asüla, Changkitsür, I. Chubala Longkumer taküm otsü tenu I.T. Longkumeri züluba kaket ka yashi April 11 nü Tiaki, Nagaland Art Space, Dimapur nung par medemer Wb. Er. Lanu Toy-i sayatsüogo. I.T. Longkumer, IPS (Retired) ya Meghalaya nung taoba Director General of Police liasü aser Er.Lanu Toy ya Power department nung taoba Chief Engineer aser Nagaland government nung Secretary liasü.

I.Chubala ya Changki

nunger tsürabur Imtisosang Longkumer aser Imsenkilepla Jamir na jala tanabuba liasü aser lar tsüraburi la nem jatsüba tenüing ajungajibo Chabanensala liasü saka la dang ajaki Chubala ta dang jaa aru. Imtisosang yaa 1922 küm Aor rongnung mezüing class ter ajangtetba tazüingtemeteter ka liasü. Pa tamapur Aor Lashirtem rongnunga ka liasü aser pa ya American Baptist Mission kübok Jorhat Baptist Mission School nung tesayur inyaka liasü. Iba mapang par tanurtema Jorhat nung azüingtsü tenzük. Ajisüaka, tesülen pa

mapa melenba ajanga par kibong ajak Nagaland-i arutsüsa aküm aser Chubala o teyi Nancy na Impur aser Mokokchung nung zünga intet.

Iba sülen Chubala ya Shillong aser Gauhati nung class ter aser terana ajangteter külen Scottish Church College, Calcutta nung 1950 küm Aotsür rongnung mezüing asütsüsa graduate asü aser ano, iba sülen 1958 küm Allahabad University nungi M.Ed renem, ibajibo Nagatsür rongnung mezüing postgraduate asüba liasü.

La ya zünger külen Mokokchung Govt High School nung tesayur inyaka government mapa nung inyaksü tenzük aser Nagatsür rongnungbo mezüing asütsüsa 1985 küm IAS jenjang nguteta Nagaland government nung Secretary menden tashi tonga inyaker mapa nungi anen. La 1925 küm November 12 nü aso aser 1999 küm December 27 anogo nung alima nungi pilaa ao.

“Keyi Chubalai ni kanga meima anepalu aser la ya tanemi dang alima nung aika asoshi teyari agüja temelenshi tajung bener arutsür tetsür tajung ka liasü. Tanübo la tsüingnep nung Nagatsürtema tashitemeteter aser taküm nung la ama jenjang tajung ajangzükterer aika kümogo,” ta la taküm otsü kaker zülur tenu I.T.Longkumeri ashi.

Iba kaket meshiteta Nükmen Baptist Arogo nung sannüker Rev. Kilang Longkumeri sarasadem.

Changtongya nung Higher Secondary Science tenzükur



(Abelen) St. John HSS Changtongya nung azünger tanurtem ken atenba noksa nung angur aser (Achiji) Nagaland School Education, Director, Razouseyi Vese-i St. John School Changtongya nung Higher Secondary lapokba sentong nung jembiba noksa nung angur (April 11, 2026).

CTN. April 12 (TYO) Changtongya town nung St. John High School nung Higher Secondary Science aser Arts class lapokba sentong ka yashi April 11, 2026 nü agiogo. Iba sentong nung Nagaland School Education department nungi Director Wb. Razouseyi Vese tongti tejaoker liasü.

Iba sentong nung jembidang, "kaketshir ka asoshi Arts aser Science na prongla ya kanga tongtibang lir, ajisüaka science azüingertemsa temerangba azüingtsü nüingdaker, anungji tokolok techirartem Arts azüingtsüla aser meranga inyaksü purtem Science azüingtsüla," ta School Education Director, Wb. Wese-isa metetdaksü.

Kaketreju ka tajung kümdaktsütsü asoshi ketdangsertemi anir tesayurtem, tsürabur aser tanurtem ajaki tesayuba aser tangazükba nung kasasa temulung agüja shilem agitsü asoshi paisa ayongzük. Paisa School kibur aser tesayurtem ajak nem High School nungi Higher Secondary jenjang tashi lapoktettsüsa inyaktetba takok asoshi tenüingsang agütsü.

Iba sentong nung Tir Yimyim Yimozülur K.Temjen Jamir, Akhoya Village Council mendenbuba Wb. B. Tiatemjen Longkumer aser School Managing Board nungi Wt. Lanumenla nungertemi tepela aser tajungshi o jembiba liasü.

Iba sentong nung adenertem ajak pelaa agizükba o School Vice Principal Chubakokla Longkumeri ashi aser Akhoya Baptist Arogo nung sannüker Rev. T. Lanui sarasadema sentong tenzük. Iba sentong nung menden tesayur Aküminla liasü.

Iba sentong nung shilem agir aser School nung Higher Secondary jenjang tashi lapoktettsüsa yaritepertem dang pelaba o lemsatepsang, "taküm mezüing küm asünungji Higher Secondary (Class XI) nung azüingtsü arurtem dang Admission fee magitsü aser tama arurtem nungi tenzük admission angati agütsütsü," ta School kibur aser ketdangser Wb. Takowatii metetdaksü.

Assam Rifles-i state nung maparen balala inyak



Dimapur, Rongchii/April 12 (TYO): Civilian ana gari lendong ajurua yirur aliba mapang Assam Rifles temi medical teyari agüja liasü. Ungma yimtsüing nungi college azünger ana motorcycle nungi tzükba sülen Assam Rifles Unit Hospital-i anir arua liasü.

Tenaprong tetsüing abelen kanga sashia atsükba den angoba aser awak aser mejajatei liasü.

Mozüki tonga arudang nisung ka süchia orr liasü aser medical team ajanga yaria nüingdakba mozü agüja anepalu.

Iba sülen tena ya X-ray agitsü atema Civil Hospital-i yok aser süchia orr alisang ya tajungba nung anepalutsü asoshi medical centre tajungba kati anir ao.

Assam Rifles temi mapang shidak nung telangzüba agüja yariba ajanga lendong ajurur alir nisung ana takum kumzük.

Lokti-rongsen terenlok aser meta talang nung alirtem jenjang tajungba kumdaaktsütsü asoshi inyakba nung shilem ka ama Assam Rifles temi Shamator district kübok Yakor yimtsüing nung computer lema agütsüba sentong ka agia liasü.

E-learning temabai ajungkettsü aser digital literacy tajungba kumdaaktsütsü nükjidong nung skill development drive shilem ka ama iba sentong ya ayongzükba liasü.

Iba yimtsüing nung alirtemi modern educational infrastructure mongutetba angateta Assam Rifles temi

kaketshir aser lanurtem nem computers agütsü.

Iba sentong nung yimdaklir tem aden aser mapa tajung asoshi Assam Rifles dang pelaba lemsatepa liasü.

Maneni Assam Rifles temi Mon district kübok Tizit nung 'A Day with Company Commander' sentong ka ayongzükba kaketshir nem awareness agüja Force nung maongka aliba aser linük yangerba nung shilem agiba indang sayua liasü.

Iba sentong nung kaketshir 52 den tesayur 7 shilem agia liasü. Iba mapang parnok ya Assam Rifles Company Operating Base, Tizit nung pelashishia agizük aser Operation Sindoor indang orientation ka agüja ano Northeast nung arütsü ketdangzüba, internal security aser civic action indang tajungba nung angazükdaaktsü.

'Hamara Bharat' indang session ka agi aser tanurtem asoshi digital tour ayongzükba liasü.

Kasa mapang kaketshir temi sepaitem den sensaksema parnoki ajangshiba aser takok anguba tem lemsatepa ajungmesoa liasü.

Ano kaketshir asoshi spoon race, musical chairs, volleyball, table tennis aser art competiton ayongzükba liasü. Iba sülen Company Commander den sensaksema mapang kaketshir aser tesayur temi Forces dak sendakba career aser takum libaliru indang asüingdanga liasü.

Districts pongu nung mobile internet shibangba atsülanger

Imphal, Rongchii/April 12 (Agencies): Manipur sorkari valley district pongu nung mobile internet services shibanga aliba ano atsülangtsüogo, koba April 14, 2026 nikongdang 2:00 ako tashi maneni nokdangtsü.

Home Department ajanga totuyuba agütsüba ya Imphal West, Imphal East, Thoubal, Kakching, aser Bishnupur districts asoshi alitsü aser yangji state yimtiba Imphal dena lir.

Bishnupur district kübok Moirang Tronglaobi nung April 7 nü nisung aliba ki ka nung bomb apokba ajanga arishi küm pongu tebur chanu ka aser ita trok kinü tanur tetsür ka tepseta tetsü yiruba sülen iba mera ya agir. Iba lendong yagi Manipur state lenden len tensa mejungi kumdaaktsü.

Iba lendong ataloker tensa mejungi akumba ajanga

ketdangtsür temi Temporary Suspension of Telecommunication Services Rules, 2024 kübok mobile internet shibangja liasü.

Mapang tatsüka lir tenokdangba kar kübok wired broadband services kar tera lapoktsü aser mobile data maneni shibangja lir.

Home Department-i tang tashi tensa majung lir ta ashir aser social media sapang tem ajanga olulu aser nübur mashi leni anisatsüsa content prokshiba ajanga public order nung timtem ajurutsü akok ta tekumdaaktsü ashi. Aibelener nem temerenshi tesashi agütsütsü, ta ketdangtsür temi ashir.

Iba tenokdangba nung mobile internet services ajunga den VSAT aser VPN connection dena lir, saka landline services bo menokdangja lir.



April 12, 2026 nü New Delhi nung Congress MP aser Lok Sabha nung opposition lenir, Rahul Gandhi-i 'Run for Ambedkar, Run for Constitution' marathon tenzüksüdang tangokba noksa nung angur.

Women's reservation atema Modi-i party tem dang teyari meshir

New Delhi, April 12 (Agencies): Women's Reservation ozüing mapa kuma benoktsü atema Amongnü Ato kilonser, Narendra Modi-i yimtenren party tem dang teyari meshiogo.

Ano külen BJP-i party MP tem dang April 16 nungi April 18 tashi Parliament nung ayongzükba temeja senden nungji ajak adentsüla, ta tuyuogo.

Lok Sabha aser state assemblies nung tetsürtem nem menden shilem 33 lezmüksüba maparen ya mapa kuma benoktsü atema ozüing tera yanglushitsüsa akümer, aser iba dak sendakba nung Ato kilonseri party ajak dang teyari meshir.

Nari Shakti Vandan Adhinyam ta ajaba ozüing ya 2023 kum agizüka liasü.

Bodhbarnü Union Cabinet-i iba dak sendakba bill ana agizükogo aser 2029 kum Lok Sabha elections matongdangsa iba ozüing ya mapa kuma benoktsü atema sorkari Parliament nung temeja senden ka ayongzükba lir.

Honibarnüa Ato kilonser Modi-i party aika dangi shidi zülua 2029 kum Lok Sabha aser Assembly elections magidangsa Women's reservation ya mapa kuma benoktsü atema pusemdaktsüner, ta mepishiogo.

Modi-i party tem dang, "April 16 nungi tenzükba Parliament nung Nari Shakti Vandan Adhinyam atema o lemteptsü. Asen democracy ano taliba tashi itshitsü atema iba senden ya maongka tajung asütsü," ta metetdaktsü.

Modi-i, "India nunger terenlok atema yimtenren nung

tetsürtemi shilem agitsüji kanga tongtibang. Terenlok akatsü, telemteba agitsü aser lenitsü atema tetsürtemi maongka angu nung ang lokti ka tejakleni aoer," ta metetdaktsü.

Paisa yimtenren party tem dang, "Iba mapang ya party ka mesüra nija ka dang nungi taoba. Iba mapang ya tetsürtem aser tarutsü lanurtem atema khuret abenba mapa agi sayutsü atema tongtibang mapang ka lir," ta shia tatartem dang iba ozüing atema o lemtepsü nung shilem agitsü ayongzük.

Ano külen Congress Tir, Mallikarjun Kharge-ibo state kar nung assembly election tagidak mapang nung Parliament nung temeja senden ayongzükba atema ashishiba den külemi sorkari opposition den mejembitepi senden ayongzük, ta aitsüogo.

Bengal nung April 23 nü vote agütsütsü temsüa alir cr. 3.6 lir: EC

New Delhi, April 12 (Agencies): West Bengal nung assembly election mezüingbuba shilem April 23 nü agitsü, aser iba anogo nungji district 16 nung vote agütsütsü temsüa alir crore 3.6 dak tali lir, ta Election Commission-i metetdaktsü.

April 23 nü vote agütsütsü temsüa alir tebur crore 1.84, tetsür crore 1.75 aser third gender 465 lir, ta Election Commission-i metetdaktsü.

Election mezüingbuba

shilemji menden 152 atema agitsü aser tanüingba menden 142 atema April 29 nü election agiba sülen May 4 nü vote azüingtsü.

District tem rongnung Murshidabad nung voters teimba lir (lakh 50.26), iba sülen Purba Medinipur (lakh 41.60) aser Paschim Medinipur (lakh 37.70) district na lir.

Voters ishiba aliba district ji Kalimpong (lakh 2.01) lir.

Cooch Behar nunga

voters lakh 22.63 lir, Jalpaiguri nung lakh 17.19, Alipurduar nung lakh 11.64 aser Darjeeling district nung voters lakh 11.10 lir.

Uttar Dinajpur nung voters lakh 19.68, Dakshin Dinajpur nung lakh 11.59, Malda district nung lakh 27.91, Bankura nung lakh 29.19, Purulia nung lakh 22.52, Jhargram nung lakh 9.10, Paschim Bardhaman nung lakh 19.65 aser Birbhum nung lakh 26.91 lir.



April 12, 2026 nü Ahmedabad nung Gujarat Chief Minister, Bhupendra Patel-i Ahmedabad Municipal Corporation elections nung tokteptsüpur BJP candidate tem den tangokba noksa nung angur.



Lt. C. Tinu Pongen

Onok mangyimba mapang nung onok dang temeim sayurtem, yaritem aser sarasademtsür ajak dang onoki pelaba lemsateper.

Lt. C. Tinu Pongen (11/07/1944 - 01/04/2026), onoki meima aliba tebu ka aser kinüingbu ka, pa ya ozü kibong atema tongti liasü. Pa dak temeim liasü, tebelem arema nendaka inyakba tebu ka aser pa taküm ajanga tatishitsü tajung sayuba atema tanü onok tajung kümdaktsüogo. Pa dak aliba temeim aser temelungtebaji onok melung nung teti alitsü aser ibaji ajanga onok teti ajungshitsü.

Talisa onoki item organizations dang alakteta pelaba lemsateper:

- Directorate of Youth Resources & Sports, Nagaland
- Nagaland Badminton Association
- Dimapur Badminton Club
- Dimapur Ao Baptist Arogo
- Dimapur District Ao Pensioner Telongjem
- Longjang Senso Telongjem Dimapur
- Longjanglar Telongjem Dimapur
- Dimapur Longjang Pongener Telongjem
- Dimapur Longjang Pongenlar Telongjem
- Dimapur Longjang Jamilar Telongjem
- Dimapur Mission Higher Secondary School
- United Colony Council
- United Colony Mothers Organization
- Newsong Church Bangkok

- Temeim Kinüingtsü & Kinüingertem

Mathi 11:28

"Nenok tebelemer aser khu reta abener ajak Kü dangi arung aser ni nenok nem anisüingzük agütsütsü."



April 12, 2026 nü Nadia district nung CPI(M) candidate, Soumen Mahato-i nüboyimdang tangokba noksa nung angur. Taruba West Bengal assembly election nung pai Santipur Assembly constituency nungi tokteptsü.

SIR tanabuba shilem kübok state 12 nung voters crore 5.18 züingdokogo

New Delhi, Rongchii/April 12

(Agencies): Special Intensive Revision (SIR) tanabuba shilem tembangogo aser iba mapatong kübok states aser Union Territories 12 nung voters crore 5.18 tenüing züingdokogo/ agienadokogo, ta Election Commission-i metetdaktsü.

SIR shilem tanabuba tembangba sülen tang linük nung registered voters ajak senteper crore 45.81 lir; tetezü tamalen aliba voters shilem 10.2 ajema kümogo. Electoral roll nung tenüing taila, tesem melenshir alirtem aser temsüa malirtem tenüing agentsü nükjidong nung SIR exercise ya agir.

Tenüing agienba crore 5.18 nungjagi tenüing lakh 66.88 bo asürtem lir. Uttar Pradesh nung süadoker alir voters lakh 25.47 agien aser West Bengal nunga asürtem tenüing lakh 24.16 agienadokogo, ta Election

Commission-i metetdaktsü.

SIR tanabuba shilem kübok Uttar Pradesh, West Bengal, Tamil Nadu, Rajasthan, Chhattisgarh, Kerala, Puducherry, Andaman & Nicobar Islands, Lakshadweep, Gujarat, Madhya Pradesh aser Goa ayimjemogo.

SIR shilem tasembuba kübok tanüingba voters crore 40 ayimjemtsü; shilem tasembubaji Haryana, Maharashtra, Karnataka, Punjab, Odisha aser Delhi densema state 17 aser Union Territories pongu nung agitsü.

Tamil Nadu, West Bengal, Kerala, Assam aser Puducherry nung assembly election agia vote azüingba sülenbo SIR shilem tasembubaji tenzüksü.

April 9 nü Assam, Kerala aser Puducherry UT nung assembly elections agiogo aser Tamil Nadu nung April 23 nü election agitsü.



TIR YIMYIM YIMOBILEM (EDITRIAL)

DIMAPUR MONDAY, APRIL (RONGCHII) 13, 2026

Kechi atema rarar ?

Taoba ita February 28 nü United States aser Israel nati Iran amaktsü tenzük. Iba mapang, parnoki Iran nung sepaitem alidak aser yimten sabang amenoka aliba tesemtem nung bomb ajungoktsüyonga aodang, Iran nung tematiba putir aser yimten lenir Ayotallah Ali Khamenei dena sapai arkhudongtem aika taküm samatsüogo. Aji oda, tamasabo US aser Israel nati Iran amakba kuliji, Iran yariba kiralongrar teloktemi Israel aser America nungertem nem timtem lendong maneni agütsüba agi, Iran nung Ayatollah Ali Khamenei tokolak ser yimsü asüba yimtenji melentsü ta ser apuso. Atangji, US toktsür, talisa Israel nung ayipjanga amui moutetbaji Palestine lima Gaza nung Hamas aser Lebanon nung Hezbollah telok amai timtem maneni agütsüba ajanga, Iran dang jashir, Iran nung yimten melentsü nükjidadong nung Iran amaktsü tenzük, ibayongji parnoki tamasa Iran nung tematiba putir aser yimsüsür Ayatollah Ali Khamenei kaset. Ano, US shisaboluba kaji, Iran nungerteni miima alima ajak ya nuclear bomb ka apok nung samatsüsa yanglutet nungbo, ibaji ajak atema lendong ta angateta Iran ya la kübok ayutsü asoshi yimten melentsüba sentongji liasü. Ajisüaka, tangbo Iran nung yimten melentsüba indang masü saka Iran nung Strait of Hormuz ajanga totzü aser gas abenba rong yoktsü asoshiang jembitsüba onük tulutiba amai kümogo, kechiyong iba Strait of Hormuz ji Iran ket nung lir aser iba tesemji ajangtsü-majangtsübaji Iran mulungba nung tashi amshir. Iba jagi Pakistan, India aser US nungertem kanga timtemtsüsa akümer. Atangji, February 28 nungi tang tashi nung anogo 40 shi raraan arudang, takoksabo Iran kanga akoksaogo, saka Iran-i Israel aser US nati amakba anema nokdaktetba tashi ya kanga tulu lir. Iba jagi, iba rara ya tang tashi nung shibai akokar meshiteter. Ibaji kodang bilemdangdir, US aser Israel nati bilemba ama, Iran ya odang toktsü nungbo parnokibo Iran nungi America tashia atongtsüsa bomb agi tayimtsü kuma yangluteter lila ta bilemer. Aji oda, Iran ama ket nung iba ama alima raksatsüsa bomb tesashi akatsübaji alima asoshi kanga lendong lir. Iba jagi, iba ama bomb-ji meyanglutaktsütsü asoshi US-i meranger. Ibayongji, Iran nung yimten melentsütsü jembia tenzükba tangbo yimten melentsüba otsüji masü saka Strait of Hormuz ajangtsüba aser nuclear bomb yanglutsüba ken o dang kümogo. Atangji, onük anaponglaji Iran asoshi haihaura akatsübaji tasak asütsü. Iba jagi, Pakistan yimteni US aser Iran na yongtsüi iagi yimjung yanglutsütsü meranga par limai kin ana prongla nungi lenirtem jaoka tejak o tejak na chitepba mendaktsür yimjung yanglutsü ken o jembidaktsüaka, tadongi marutet senshiogo. Atangji, khen amen dang ken o tadongi marutetji ojang ta masü saka tangatetep kati arua yimjung meyanglutet tashi yimjung ken o ji jembibet jembia atatsüla, iba jagi dang raraji anentsü, kechiyong raraba nungji shinga majangzüker. Tang ya Israel-ji yutsür, US aser Iran na tsüngda rara ya shibai akokar meshiteter. Ashiko, US-i parnok takoklen lir ta bilema Iran den jembir asütsüa akok, saka Iran-ia parnokiang rara koka odar ta bilemer. Iba jagi, yimjung ken o jembiba nung Iran-i US tsüngdang nema malur aser rara anener yimjung nung alitsü asoshi temepishia memepishir. Aji oda, tang tashibo tamak-a US-i amaker aser yimjunga US-isa lapoker. Ajisüaka, iba jagi US tamakokleni aoer ta masü saka US ket nunga ano kechiang ka lir-ar ashitsü makok aser Iran-ia komaka nokdaktsü bilema lir-ar ashitsü makok. Iran nung yabo, parnok ali telong nung yimti kuma yanglur, yang nung jagi yimten mapaa inyaker aser teraraa rarar aser odanga Iran nungertemi shinga tsüngdaa teka memetongtsü. Iba ama tia ka nung, US-i kanga shisakaa masayara, ashiko, meyiper alima tsüngdang US-ang mak asütsü ana nung lir. Atangji tang ya US-i lapokba yimjung mapang lir, iba mapang ya süitemerbo, Iran den yimjung meyanglutetra, Iran nung yimten aser sobaliba ajak samatsüsa inyaktsü ta Trump-ibo metetdaktsüogo. Ano, külen Pakistan-i maneni rarar teloktem tsüngda yimjung o jembitsütsü merangtsü shia lir. Ajisüaka, tang amaisa ora, US Israel aser Iran na rara ya Iran nung yimten melentsüba atema masü saka Strait of Hormuz madak yimten tashi raktepba mapa ka kumadoktsü aser idangjiang, ashiko, alima rara asemubaba tenzüktsüa akok.

OLEMSABANG

MAPA MEDENI TAMANG TASÜ... SAKA TAMANGJI MAPA AGI MEMETENDAKTSÜR

~ L. Kika Pongener

(Yashi adok nungi...)

Tamanger khristan tajung ka, temesepba chiyungtsü achi-ajemba ajak nung asüngteta alir; libaliro ajunga nung tashishitsü maka, ajak dang temeim mapa inyaker, angadi aika agütsür, ajak den yimjung anung alir, shinga anema o tamajung mejembir, pa adenba lokti ajak nung ochishia inyaker, pa mapa kecha nunga tashishitsü maka. tekülem sentepi teti aor, teti sarasademba taküm ka aser tershilem tenla shitak agütsür. Ajisuaka, pai item mapa tajung inyakbaji....Alima nung alidang mapa tajung inyaknungdang pa lokti nung jenjang (Position) ajungtsü, konang-nungsang (Prestige) angutsü, tangari züngshittsü aser ajaki akümstübuttsü (Respect) aser sobaliba, yimden-yimli temzüng-ozüng talenba nungi jenbua alitsü....Iba tangatetba nungji pai mapa tajungji inyaker. Ajisuaka, pai Tsüngrem dak chichia amangba mali aser pa tekümtet akaba taküm ka masü.... Oda mapa tajung inyaknungdang pa alima nung jangradema alitsü asüba agi inyaker. Anungji ozüng beshiba mapatem jagi pa memetendaktsütsü....Tenyar Paul-i ashibaji ibaji ashiba asütsü. "Aser o nung sushia; mapa nung sushia; nenoki kechisa inyakdir; Kibuba Yisu tenung nung mapa ajak inyakang (Kolosi-3:17). Nenoki kechisa inyakdir nisung dang masü; saka Kibuba dang temulung ajak agi inyakang" (Kolosi-3:24).

Anungji, mapa tajung inyakbaji alima nung mimchir sobaliba yimsu-ozüng beshiba mapa ka dang sura....Item mapa tajungtem jagi pa/la tamangji memetendaktsütsü. Yihuda nung yimsu nung lenir Farise, Saduki, Tezülurtemi Mosa ozüng nung aliba ajak kata mezütoki beshia mapa tajung inyak; oda aonsotsü rongnung tilatiba 'napa' dena tenla agütsüba laishiba nungji angur....Saka Yisu-i ozüng mapatem agi parnok mekümzütsü ta parnok aitsüba angur. Mapa tajung yabo tanga yimsu amangertem....Hindu, Muslim, Budhist, etc. parnok-ia aika dang inyaker. India nung kin tebu Mahatma Gandhi, pai laishiba ya teti azüng; aser laishiba nung shia aliba ama mapa tajung inyaka beshia ochishia pa taküm aliba otsü angazük. Ajisuaka, pai Yisu Khristaji kü kümtetdakba aser Kibur ta magizüktet; kechiyong pa "Hindu Ordodox" ka liasü. Mapa tajung inyakba agi metentsü asübo Mahatma Gandhi ya metenla.

Atangji, Yihuda nung Farise, saduki aser tezülurtemi ozüng beshia mapa tajung jenti inyak....Saka ibaji parnok temeshia ta nisung tsüngdang sayutsü inyakba ka dang liasü. Anungji iba mapa tajungtem jagi parnok tamang temeden mangu. Tenyar Paul-i ashibaji, ozüng agi mapa tajung inyakba jagi masü, saka tamang nungi atokba mapa agi dang metentsü ta shinur. Ozüng beshia mapa tajung inyakba agi tamangji memetendaktsür; kechiyong ozüngji temenen lir.

Ano tenyar Yakob-i shinubaji....Tamanger kati mapa agi inyaka mesayutetra, pa tamangji kecha tetezü maka, tasü den sakü ta ashibajia kanga shidak lir. Kechiyong tamanger kati tamanger tajung ka ama mapa agi sayutettsüla. Ano Paul-i ozüng mapa agi masü tamang agi dang metendaktsür ta ashibajia shitak lir, Anungji Tenyar Yakob-i ashiba aser Tenyar Paul-i ashiba o anapronglaji sendaktepa lir. Anungji asenoki asenok khristan tamanger tajung ka ta mapa agi inyaka sayudi.... Aser asenoki inyakba mapa tajungji....Tamanger kati mapa tajung inyaktsüla ta tema tazütsü ozüng beshiba mapa agi masü, saka asen tamang taroktiba nungi atokba ajanga mapa tajungji inyakdi.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agütsü mepishir

University of Samford nung UniteUS sentong ayaterm tashi agi



April 10, 2026 aonung Samford University nung UniteUS sentong agidang aser bapting tangokba noksa nung angur.

April 12, 2026: April 10, 2026 aonung University of Samford nung aliba college football ground nung UniteUS sentong nung kaketshir meyrjang aika aden.

Iba sentongji ayaterm tashi agi liasü aser kaketshir noklang aikati Khrista agizük.

Tesüsabuba UniteUS outreach sentong April 8 nü Birmingham, Alabama nung agia liasü aser iba sentong nungjia aikati Khrista agizüka bapti.

UniteUS tentetla, Tonya Prewett-i, "Tsüngremi Samford University nung mapa inyakogo. Iba sentong nungji kaketshir meyrjang aika

adenshia Tsüngrem külem. Kaketshir aika talenba nungi salaa tatok angu. Taküm kuli aika lemsatepdar. Onoki ayaterm tashi kaketshirtem baptija liasü. Sentsüwanghi ajak Tsüngrem meyong süang," ta metetdaksü.

Ministry-ia, "UNITE Samford sentong nung tepela liasü, tzüraba liasü aser taküm bendanga agütsü. Kaketshirtemi parnok akaba ajak agi Yisu tenüng ajungkettsüogo aser football asayaba moapu nung aika baptiogo," ta metetdaksü.

"Kaketshirtem aika adenshiba atema pelar, medemertemi medemertem

ayongdena liasü, lenirtemi sarasademja liasü aser Tsüngremi mapa tulu inyaka ajak kongshi. Langka tepor tajung nung Birmingham-ia shilem ka agitsü. Yisui college campus tem nung mapa inyakdar, Pai takümtem melenshitsuđer aser Samford nung ibaji kuli süa anguba atema onok pelar," ta ministry-isa metetdaksü.

Taoba hopta nunga Florida State University, Tallahassee nung UniteUs sentongtem agi aser noklang aikati Khrista nem taküm bendanga agüja bapti.

Taruba UniteUS sentongji April 28 nü Oklahoma State nung agitsü.

ANOGO ABEN TSÜNGREM DEN

Tenüngsang agütsütsü atsüayong tesü

"Kechisarena nung tenüngsang agüjang"
(1 Tesa. 5: 18)

Khristan aikati Tsüngremi mulungba metettsü tasak ta jembir. Tenüngsang agütsüba mapela mapa ama bilemer. Tenüngsang agütsüba mapa ya temela masü, aser Tsüngremi mulungba metettsüba mapela masü. Anaji Khristan takum nung shilem ka lir. 1 Tesalonika 5:18 nung Tsüngremi mulungba metettsü aser anitaksü tasak ta mashir.

Aikati Tsüngremi mulungba metettsüba mapela lateta kar ta bilemer. Saka asenoki dang tashi angara Pai mulungba metettsüba kecha tasak masü.

Tsüngremi ashi, kechisarena nung tenüngsang agütsütsüba Pai mulungba. Pai ashi, "ajak nung tenüngsang agüjang." Ajak nung tenüngsang agütsütsüba asenok mapa. Techir kati tebu dang pelar ta ashitsüba tanur mapa.

Shirangba, sen tebilemtsü, kibong nung kar samaba ajakji kechisarena nungji dena lir. Kari asen anema apusora, asenok temulungjang lapoker Tebu dang "Ya kechiba ataloker ni mangateter, saka ni Ne shisatsü nung temulung alemem aser ni Ne tenüng asanger" ta ashitsüba asenok khristantem mapa. Asenok tanela ainba nung shilem kaji tia ajak nung Ne tenüng asanger ta ashibaji lir.

Reza Safa-i Yisu Khrista ajurua Khristan pastor ka akümba lemsatep



Reza Safa

April 12, 2026: Iran nung lenirtem nükjidongji Israel aser America na samatsütsü atema lir, aser parnoki Israel ya 'Satan tilaba', America ya 'Satan tuluba' aser Muslim nung masüba nisung ajakji mamangertem, ta züngshir.

Item ama lenirtem rongnung Reza Safa-a densema liasü. Reza Safa ya Iran nung Shi'ite Muslim nung ka ama intet, ajisüaka tesülen pai Yisu Khrista atangji ajuru.

1978 küm pa Iran nung America-i oa college azüngba mapang nunga pa Shi'ite Muslim nung ka liasü. Iba sülen 1979 küm Iranian Revolution nung shilem agitsü atema pa Iran-i ao aser yimsü lenir Ayatollah Ruhollah Khomeini leniba nung Shah Mohammed Reza Pahlavi yimsüsüba atsüngdoka liasü.

Iba sülen Iran nung makmakshimak tulu adokba ajanga pa kanga ratamata-a liasü.

Tawa interview ka nung jembidang pai, "Künü anogo ni kütsü dang 'Ni Iran toktsür aotsü aser kodanga meshilangtsü' ta shia liasü. Ajioda ni Iran toktsür Sweden-i ao aser Swedish nung missionary ana ajurua liasü.

Tenati ni parnok kidangi anir ao, ni mesü aser kü nem Persian oshi nung Laishiba ka agütsü. Ni Laishibaji azüng tenzüka liasü," ta ashi.

"Ni Laishibaji kanga nendaka azüng, aser kü taküm nung ni mezüng Tsüngrem ola angashia liasü. Ni nai jembiba angashiba ama ni Tsüngremi jembiba jangjangja angashia liasü. Persian oshi nung kü dang, 'Reza, joko nai yamai sarasadem asütsü menüngdak, saka Kü dang sarasademang' ta ashi," ta pai metetdaksü.

Ajioda Safa tamang jengang ina pa Khristan pastor ka aküm aser pai Farsi oshi nung Khristan channel TBN Nejat-TV tenzüka liasü. Tangbo iba Khristan channel jagi Iran densema Middle East tesem ajak ayimjemer.

Tangbo pai US Tir Trump nem Iran nung yimsü leniri yimsüsüba ya tembangdaksüner aser Iran nüburtem nem temeden agütsüdaksüner.

"Iba yimsüsüba laodaksütsü atema tang mapang ya America atema, asen Tir aser asen tarutsü tia atema kanga tongtibang mapang ka lir," ta pai ashi.

Libya nung Khristan 150 shi dang lir aser parnoki mimshia külemer

April 12, 2026: Africa nung aliba Libya linük nung lisopur Khristan ka ajurutsüjia kanga tasak, kechiyong iba linük nungji Khristan 150 shi dang lir.

Libya nung Khristan yimsü mesamadaksütsü atema Khristantem jagi kanga meimshia dang Tsüngrem külemer.

Akhidang nungi Libya nung Khristan yimsü liasü; Yisu yaria Kangki khen melenzüka aputsüsang, Cyrene nung Simon ya-a par mapang northeastern Libya nungi liasü.

Tesüiba küm 2,000 tsüngda Libya kidanger Egypt nungbo Khristan nütsüng kanga renlokogo, ajisüaka Libya nungbo merenloker.

Islamic yimllii North Africa atsüngba sülen nungi Libya nung Khristan nütsüng kanga ajema aküm, aser tangbo iba linük nung lisopur Khristan ka ajurutsüa kanga tasak.

Tang nütsüng million 7 aliba Libya linük nung nütsüng teimbaka Muslim nungertem lir aser Muslim nung masüba nisungtemji teimbaka Africa mesüra Asia nungi aruba bendanger mapa inyakertem lir. Libya nung yimsü temeden mali, ibayongji bendanger Khristantembo agizükaka lisopur Khristantembo

magizükteter. Tang alima nung Khristantem alitsü linük tamajungtiba 50 rongnung Libya ya jengang 9buba nung lir. Küm ana tejaklenbo jengang 3buba nung liasü.

2011 küm Libyan revolution sülen nungi balaka Islam yimsü alia amangertem kanga bulua adok. 2015 küm February ita nunga Libya nung aliba tzüyiküm ka nung Islamic State kiralongrartemi Egypt nung Coptic Khristan 20 den Ghana nung Khristan ka tepseta liasü. Kasa kümjisa April ita nunga IS-i Libya nung Ethiopia nung Khristan 30 tepseta liasü.

Libya nung bendanger Khristantema puer aoba sülen parnok chioktsü atema sen meshir mesüra mapa tasak inyakdaksür. Iba dak alia alartem ayokba market-a tenzüka liasü.

Libya nung "Arab Spring" sülen iba linük nung aliba Khristan nütsüng shilem 90-ibo linük toktsür ajanba ajanga tangbo Khristan ishika dang anünga lir.

Libya nung telemsa tulu adoka lir, aser iba ama tensa mapang ka nung Khristantemi pei ki shibanger kanga mimshia dang sarasademem aser

Khristan maitsü mimshir.

Libya nung bendanger Khristan ka, Nathaniel-i, Libya nung Tenla ki ishika dang anünga lir, aser item tekülem kidangi aotsü atema pai online ajanga tongtepratepba atema pa amokmerena liasü, ta metetdaksü.

Paisa, "Iba linük nung tanga yimsü amangertembo aitsür," ta metetdaksü.

Nathaniel-i, "Tang tashi ni Libya nung lisopur Khristan ka danga majuru. Ibaji tesüngmangtsü ka masü. Libya nung Khristan lenirtemia lisopur Khristan kata majurudang ta ashir," ta metetdaksü.

Libya nungbo Muslim nungertem nem Khristan kakertem agütsüra tasüba temerenshi agütsütsü akok, ajisüaka aiben aibelenertemji linük nungi dang meindoker.

Ano aibelenertemji lisopurtem süra tepuokdak ayur, reshikangshir aser kangshia Islam yimsü agizükdaksür.

Yaküm April ita tashi nung Libya nung lisopur Khristan 13 tepuokdak liasü. 2022 küm September ita nung Khristan ka nembo tasüba temerenshi obendang agütsü ajisüaka tang tashi iba temerenshiji magütsü.

AO OSHI ANGAZÜKDAK:

TANÜ ANGAZÜKTSÜBA OJANG



Watemdong

(n) ozü teti atemba kongsang (birds favourite branch of a tree)

* Watemdong nung ozü tema alidang maritoktsüla.

Watet

(v) arem kümzüka yutetba (reserved forest)

* Asenok yimtsüng shia nung arem wateta ayur.

OLONG PAITEP # 7472

Grid for Olong Paitep # 7472 with numbers 1-16 in various positions.

TIPILEN

- 2. Auonung chiyongsü asenba
5. Mangyimba mapang
7. O tamendakdak
8. Peidak malangba
10. Juli
12. Sen ayudak
14. Tenük agi ajitet
15. Tamajung aküm
16. Apuso

LANGTSÜNGLEN

- 1. Lenmang
2. Aor kidong ka tenüng
3. Tenarong maten
4. A ___ g
6. Mopung apodoka
9. Tongtipang tagitsü
10. Menungra bilem
11. Aiür
13. S ___ k
14. T ___ r

OLONG PAITEP # 7471 TELANGZÜBA

TIPILEN :

- 1. Yiar, 3. Tesola, 7. Yimra,
8. Tangar, 9. Peria, 10. Tanur,
11. Tasen, 13. Lemjem, 15. Tambu,
16. Khuret, 17. Sang.

LANGTSÜNGLEN :

- 1. Yimti, 2. Amen, 4. Shiner,
5. Alaka, 6. Satan, 9. Putet,
10. Tembar, 11. Tatok, 12. Amang,
14. Jala.

NAI-A YA METETTER



Apollo Hospitals-i Hyderabad, Telangana nung aliba Jubilee Hills facility nung anogo 155 tsüngda robotic cardiac surgeries 100 agiteta alima otsü tasen ka yangluogo.

Apollo Hospitals Group nung Joint Managing Director Dr Sangita Reddy-i iba world record yanglutetba osang ya metetdaksü aser laisa iba ya cardiac care wadang nung kodanga meinyakdangba aser otsüsütsü maparen ka lir ta ashi.

Apollo-i India nung robotic-assisted surgeries dena medical technologies tajungtibatem bener arua yarir ta laisa ashi.

Manipur University-i NWSP nung takok angu



Imphal, April 12, 2026

(Agencies): 4th Association of Indian Universities (AIU) National Women Student Parliament 2025-26 nung Manipur University-i 1st runner-up jenjang nguogo.

Manipur University nung Dean of Students' Welfare office ajanga audition ka agidang department balala nungi tetsür kaketshirtemi kanga jangrabangraa shilem agia liasü. Iba ajanga kaketshirtemi dialogue, leadership aser policy-making yangluba sabangtem nung shilem

aginüba sayua liasü.

Manipur University nung audition mapang selection process akanga agir Department of South East Asian Studies (SEAS) nungi Jessy Thiyam, Department of Chemistry nungi Lepsopthei Kasar aser Department of Political Science nungi Naorem Chelsia shimteta liasü.

Par asem ya Dr Kh. Radhapiyari Devi ajanga tesayuba agütsü aser lai team manager ama shilem agi.

Chaudhary Bansi Lal University-i April 3 nungi 5, 2026

tashi "Developed India 2047: Role of Women" omen nung ajemdaker National Women Student Parliament 2025-26 ayongzüka agi,

Iba tetoktepba nung linük nung university 22 nungi kaketshirtemi shilem agi aser Lovely Professional University-i mezüngbuba jenjang takok angu.

Iba tetoktepba nung Lepsopthei Kasar nem Best President Award agütsü aser iba ya lai parliamentary proceedings kanga junga ketdangsüa agiba atema lir.

Tipra Motha-i TTAADC menden 28 nungi 24 nung takok angutsü

Agartala, April 12, 2026

(Agencies): Tipra Motha founder aser tanishir Pradyot Kishore Debbarma-i Tripura Tribal Areas Autonomous District Council (TTAADC) elections nung menden 28 nungi 24 nung takok angutsü ta yashi metetdaksüogo.

"Tipra Motha-i takok tulu angutsüba ya ground-level feedback aser telok tashi ajanga sayur" ta Honibarnü Gandacherra nung party sentong ka nung

jembidang Debbarma-i ashi.

Paisa nübortem dang Tipra Motha nem votes enoktsütsü aser iba ajanga council sasep nung ketdangsübaren tajung akümstsü ta mepishia liasü.

"Nübertemi regional party tem nem votes lemsar meinoktsütsüla kechiyong Indigenous Peoples Front of Tripura nem vote enoktsüba ajanga Bharatiya Janata Party (BJP) ang ajangzüksü akok aser iba ajanga menden 28 agi ak0mba

council nung timtem ajurutsü" ta Debbarma-isa metetdaksü.

Tesüiba küm ana tashi lisopurtem asoshi inyaktsü jembia aruogo saka mapa maküm anunggi tan election nung telemtetba tajung agitsüla ta paisa ashi.

"Tipra Motha nem council ketdangsütsü tashi agütsüra Mizo, Reang, aser Chakma nung amala lisopurtemi jembiba oshitem formal recognition atema inyaktsü" ta Debbarma-isa nangzüük.

Kakching nung tanurtemi Tronglaobi bomb lendong aitsü

Imphal, April 12, 2026

(Agencies): Manipur nung Tronglaobi bomb amakba anema lungkak aitba manener aser April 11 nikongdang Kakching district nunga tanurtemi candlelight vigil ka nung shilem agiogo.

Kakching district kübok Pangaltabi nung tanur telok kati Tronglaobi nung tepsetba tanur ana nem tetushi agütsü.

Parnoki shimo milentem tsüklok aser ola madoki asür nem tetushi agütsü. Parnokisa tanur

tepsetba atema temeten meshi aser aija yimyim ayim.

Kakching sentong ya Coordinating Committee on Manipur Integrity kübok agi ta tayongertemi ashi.

Iba sentong nung adenertemi bomb amshia amakba aitsü aser tasürtem asoshi temeten meshi. Ano nisung karibo Narendra Modi aser Amit Shah na dena central leadership aitsüogo.

Manipur kübok tesem ajungaleni Tronglaobi bomb

lendong ya aitsür. District balala nung telok balalai iba tatalokba anema lungkak aitba sentongtem ayonga agia arudar.

Bishnupur district kübok Tronglaobi yimtsüng nung bomb lendong atalokba atema maneni bushisüngdang südar ta Home Minister Govindas Konthoujam-i ashi.

Iba lendong ya April 7 anepdang Tronglaobi nung ki ka nung atalok aser idanggi tanur ana mejanga lia pokset aser tetsü yiru.



Assam Police-i Dhubri district kübok Dhubrirchar area nung Rs 2-3 lakh shi alang auyaba süngpak aika ngutetogo aser iba dak sendakba nung nisung asem apu. Local timber depot kibur Nur Mohammed-i ken o ka benokba sülen police-i bushisüngdanga aru. Tesüiba ita asem nungi pezü tsüngda pa meyong süngpak aika auyaogo ta Nur Mohammed-i ken o benokba nung shia lir aser April 11 aonung iba temeket nung alirtemi temulung melemi bilemer ana apuba sülen police-i parnok apu.

Hungary nung parliamentary elections agitar

Budapest, Rongchii/April 12 (Agencies): Hungary parliamentary elections atema voting tenzükogo aser tang teinyakdak Ato Kilonser Viktor Orban-i küm 16 tashi yimsü süa aruba sülen tang tetokteper tesashiba lir.

Parliament menden 199 atema voting ya Deobarnep 6:00 ako nung tenzük aser nikongdang 7:00 ako (par mapang) nung shibangtsü.

Tesüiba hopta ana tashi opinion polls nung Orban'er Fidesz party dang Peter Magyar'er centre-right opposition Tisza party ya percentage points 7 nungi 9 tashi agi tajungba ama sayua Tisza yagi shilem 38-41 tashi angutsü ama sayur.

Eurosceptic nationalist Orban-i iba election ya rara aser yimjung tsüingta shimtsüba lir ta ashir.

Nübuyimba mapang sorkari linük tesem ajunga nung Tisza lenir Magyar-i Hungary ya Russia-i Ukraine den raraba nung atsüoktsü ta tekumdangtsü

prokshia liasü, koba pai khenyongi magizüker. "Ni yangi akoktsü atema arua lir," ta Hungary Ato Kilonser Orban-i linük yimtiba Budapest nung polling station ka nung vote agütsür ashi.

Ajisüaka küm asem rongsenketzung mainba aser osettsüset nung jenjang timba akumba, aser ano sorkar den tesendaktep tajung alir oligarchs tem rongsen tali bendener ta osangtem aliba sülen Hungary nung er aikati arishi küm 62 tain Orban mesakloki akumer.

Taoba mapang sorkar nung alir arishi küm 45 tain Magyar ya küm ana tejakdang ang yimjak nung temai adoka rongsenketzung mainba mechi pa bhukumer tali akum.

Hokulbarnü linük anüdoklen Miskolc jila nung jembidang, "Ibai asen linük jenjang aser asen linük tarutsü tia asoshi referendum ka asütsü," ta shia liasü.

National Election Office ajanga ashiba agi, mezüng preliminary results ya polls shibangba sülen sangdongtsü

imlar. Ajisüaka tetokteper ya kanga anasatepa lira, taruba Honibarnü ballot züingmaba sülen ang takok angur ya sangdongtsü akok.

Iba elections nungya bendangeri teka amoshitsüa tetsübo lir.

United States Vice President JD Vance tan hopta tetenzüklen Budapest semdanga Orban asoshi nübu yimja liasü aser "Brussels bureaucrats" temi teka sangshir ta aitsü. Orban'er party-i takok ngura, Trump-i US "economic might" ya Hungary dangi bener arutsü nangzüka lir, ta pai ashi.

Brussels nungi iba election kanga züingzunga repranga lir, aser European Union nung külem pur temi Orban ya aitsür, shiba Russia Tir Vladimir Putin tembar aser Trump den tesendaktep tajung lir.

Hungary anüdoklen kidanger Ukraine asoshi Orban-i tamakok ajuruba ya Kyiv rara asoshi tongtipang 90-billion-euro (\$105bn) EU loan salatsü.

Molungnen O



ASO : 17/02/1944

ASÜ : 01/04/2026

Late IMDAKSASHI JAMIR

Ochiba jong amer, yimli agi sünga aliba obala asür IMDAKSASHI JAMIR (Longmisa), pa shirangba mapang nungi akumilir wadang tembangba mapang tashi nung kiyong kidanger, yimtsür yimer, Arago, Yimden yimsüsür, medemsor, ana aser talang nungi pur medemertem shirnokisa tamang nüktzü, aria bilem den nübo, rongsen agi ozü tako marok lemsatepogo, nenok ajak dang kanga pelar.

Tulusang Tsungremi nenok temeim mapa tajung asoshi tali dang moajangma ta aji ozü sarasadem.

Temeim nung,

Kinungtsü, Chirnur, Semchir, Anükapang aser Kinungertem.

Australia PM Albanese-i Brunei aser Malaysia semdangtsü

Sydney, Rongchii/April 12 (Agencies): Australia Ato Kilonser Anthony Albanese-i iba hopta Brunei aser Malaysia semdangtsü. Middle East nung rara ajanga totzü shibelenba nung tetsükdaktsü adoker aliba mapang Asia nung allies tem den totzü supply atema tesendaktep akangshitsü asoshi PM-i iba linük ana semdangtsü lir.

Albanese-i April 14 nungi 17 tsüingda Bandar Seri Begawan aser Kuala Lumpur semdangtsü, ta pa indang office sangdong ka ajanga Deobarnü metetdaktsü.

Pai Brunei yimsüsür Sultan Hassanal Bolkiaah axser Malaysia Ato Kilonser Anwar Ibrahim na den ajurteptsü.

Foreign Minister Penny Wong-ia, Brunei aser Malaysia na nung Foreign Minister tem den ajurteptsü, ta kasa

sangdong ajanga metetdaktsü. "Brunei Darussalam aser Malaysia amala tongtibang regional partner tem den sendaktepa aliba ajanga ken o mejangjai aliba mapang Australia energy supply kümzüka toktsütsü," ta Albanese-i ashi.

"Onok indang totzü supply manendaktsütsü atema tongtibang partner tem den sendaktepa alitsü asoshi onoki jenjang ajak agidar," ta paisa shisem.

Iran-i Strait of Hormuz nokdanga yur aliba mapang totzü supply meraksadaktsütsü atema Australia ya Asia nung parnok allies tem dak metaloker lir.

Australia-i totzü shilem 80 bo tangalen nungi bener arur aser iba strait shibangba sülen totzü agi anüingba den jenjang timba akümba ajangshia arudar.

Malaysia ya Australi asoshi refined totzü supply asür tulutiba rongnung tasembuba lir aser iba den parnok indang fertiliser-grade urea imports shilem 10 iba linük nungi bener arur. Kasa mapang nung Australia-i Malaysia indang natural gas shilem 95 agütsür.

Brunei-i Australia indang diesel imports shilem 9 aser fertiliser-grade urea imports shilem 11 agütsür.

Sorkari Brunei, China, Indonesia, Japan, Malaysia aser South Korea nung den totzü dak sendakba nung sensaksemogo.

Kasa mapang nung Albanese-i taoba hopta Singapore semdanga Ato Kilonser Lawrence Wong den Hokulbarnü ajuruteper aser lenir ana yagi energy dak sendakba nung teka amteper inyaktsü mulungtepa liasü.

Trump-i Strait of Hormuz mokdangtsü nangzüker



Washington, Rongchii/April 12 (Agencies): US Navy-i tangsa Strait of Hormuz shibang tenzüktsü, ta Tir Donald Trump-i Honibarnü ashiba ajanga rara tembangtsü asoshi Iran den mapang talangka agia jembishinüba nung tamakok ajuruba sülen hopta ana ceasefire sangdonga aliba nung tebilemstü akar.

Trump-isa pa indang Truth Social post ka nung, Iran nem toll agütsür aliba rong tem ajunga US-i international waters nung mesenzüdaktsütsü aser strait nung Iran nungeri yuja aliba mines tem raksatsü tenzüktsü, ta ashi.

"Tang nungi tenzüka United States Navy, Alima nung Tajungtiba-i Strait of Hormuz telungi aitsü mesüra temai adoktsü merangba rong mashi aser ajak mokdang tenzüktsü. Ni Navy dang Iran nem toll agütsür aliba rong ajunga International Waters telungi maitdaktsütsü totuyuba agütsüogo. Ozüing agi memelaba toll agütsür shinga iba tzüyim ajanga tiptema mesüyutsü," ta Trump-i ashi.

"Onok aser tesunep nung aliba rong tem dak Iran nungeri khara, molumi leni pokzüka yoktsü!" ta ashi.

Nisung meyirijang aika tepseta alima rongsenketzung anakshija aser totzü jenjang tali kumdaktsüba hopta trok rara tembangtsü asoshi jembishinüba nung tamakok anguba atema kati ka tenüing sena liasü. "Osang tamajungji, onok

tangatettep kati marutsü, aser iba osang tamajung ya United States of America dang nungi Iran asoshi tali tamajungba asütsü," ta hopta tatemlen jembishinüba nung tekolak sür Islamabad-i aosang Vice President JD Vance-i ashi.

"Asen red lines ji kechiar onoki kanga jangja shiogo," ta Vance-i ashi.

Foreign Minister Abbas Araqchi den külemi Iran delegation anir aosang Parliamentary Speaker Mohammad Baqer Qalibaf-ibo, onoki tarutsü nükla nung rangloker mera balala agüjaka US-i Tehran temulung alemtsüsa meinyaktet, ta tenüing asen.

"US-i Iran indang logic aser principles angateta lir aser onoki temulung lemtettsü-melemettsü atema parnoki telemtetba agitsü mapang lir," ta Qalibaf-i X nung ashi.

Vance-i ashiba agi, Iran-i American terms magizük, aser yangji nuclear nok-nü meyanglutsü densema lir.

"Iran-i nuclear mangdang yutsütsü memulunger!" ta Trump-i mapang tatsüka lir ashi.

Iran indang semi-official Tasnim news agency ajanga ashiba agi, US-i talitabong ahangba ajanga tezüingzüktep meyanglutet. Danga Iranian media temi ashiba agi, ken o aika nung angatettepba liasü saka mangatettep tulubaji Strait of Hormuz aser Iran indang nuclear sentong liasü.

Ceasefire anema inyaksangshiba atema Russia aser Ukraine na aitsütep

Moscow, Rongchii/April 12 (Agencies): Ghonda 32 ceasefire benoktsü atema nangzüktepba ama minyakba atema Russia aser Ukraine nati Deobarnü kati ka dang tai tongloksütepogo.

Osang ajanga ashiba agi, Orthodox Easter nungdem nung Honibarnü ceasefire ya tenzükba sülen ghonda ishika dang lir drone aser tanga prangbong balala meyirejang ka dak tema amshia linük ana ya kati ka maktepa liasü.

Russia defence ministry-i ashiba agi, parnoki Honibar aonung nungi Deobarnü tashi nung ceasefire atema nangzükteper aliba nung 1,971 ben aibelenba mangaoka lir. Kasa mapang nung Ukraine indang general staff-ia Russia nung sepaitemi injang agi 479

ben aser drone agi 1,700 ben amakba indang osang agütsüogo.

Orthodox tamangba yimsü calendar dak ajemdaker taküm Easter ya Deobarnü amunger. Linük anaprongla nung iba tamangba sülen anidakertem aika lir.

Russia-i ashiba agi, Ukraine nung indang drone agi Kursk tesem amakba mapang yirurtem rongnung tanur ka densema liasü. Belgorod tesem governor Vyacheslav Gladkov-ia Ukraine-i bomb pokloksüba mapang nisung ana tepsetogo, ta ashi.

Ukraine indang State Emergencies Service-i, Deobarnü Russia-i drone amshia Kharkiv tesem amakba mapang civilian ana yirua liasü, ta metetdaktsü.

Kremlin otongdar Dmitry Peskov-i Deobarnü ashiba agi, nüburtem taginüba aser tejangraba temulung dang yur Russia tir Vladimir Putin-i iba ceasefire ya benokogo, saka mapang tembangli nungi Russia nung sepaitemi maneni rara tenzüktsü.

"Putin-i Russia military dang parnok rongshira telangzüba agütsütsü asoshi kümküma alitsü atema tetuyuba agütsüogo," ta Peskov-i ashi.

Putin-i Orthodox Easter ceasefire ya April 9 nü sangdong aser iba ceasefire ya Deobar aonung ayaterem nung tembangtsü ta metetdakja liasü.

Ukraine tir Volodymyr Zelenskiy, shiba taoba mapang ceasefire ka benoktsü atema shidanger liasü, pai iba ceasefire ya akümstübuttsü ta shia liasü.

WC squad nung adentsü atema Neymar-i pa temsüa lir ta sayutsüla: Ancelotti

Rongchii/April 12, 2026 (Agencies): Brazil coach Carlo Ancelotti-i, FIFA World Cup atema asayar 26 agi kumtetba squad nung Neymar Jr-a züngoksemsü takoktsü aliba lemsatepogo. Pai ashiba agi, Neymar-i World Cup asayatsü atema temsüa lir ta sayutsü asoshi ano ita ana.

Ancelotti-i, Neymar temang anema lira pa team nung züngoksemsü atema asadangtsü ta shia arudar, saka pa taoba ita France aser Croatia na den warm-up asaya nungbo Brazil indang squad nung mezüngoksemi liasü.

Neymar ya Brazil nunger rongnungi goal timtiba idaktsüba asayar lir aser pai tang tashi nung goal 79 idaktsür lir, ajisüaka pa 2023 kum October ita temekok kanga mejungi yiruba sülen nungi national team tenüing nung khen danga asaya mali, aser taoba kum Santos-i meyipa aoba sülen pai tang tashi junga masayateti arudar.

Boston nung France team goal 2-1 agi makokba sülen fan temi Neymar tenüing ayim tenzük, saka iba mapang fan tem takhangba ya Ancelotti-i sentoka toktsü aser ashiba agi,



shimer aliba asayartem dak rangloker inyaktüsü.

Ajisüaka World Cup asayatsü lia Brazil-i asayartem maneni asadangba mapang Italy nunger coach yagi ashiba agi, Santos forward ya pa mulung nung lir. Taküm iba asayamung ya United States, Canada aser Mexico nung June 11 nungi July 19 tashi asayatsü.

"Pa sempet tajung aketba asayar ka lir aser World Cup akoktsü atema pai onok nem teyari agütsütetsü ta nüburtemi bilemer," ta Ancelotti-i France indang osang kaket L'Equipe den sensaksemba mapang ashi.

"Pa tang CBF [Brazilian

Football Confederation] aser ni asadangdar aser pa taruba World Cup asayatsü asoshi temsüa lir ta sayutsü atema ita ana anunga lir.

"Pa temekok yiruba sülen Neymar-i meyiper arua kanga junga asaydar aser pai goal-a idakjda asayadar. Pai maneni iba lenmang nung jajatsüla aser fitness tajungba kumdaktsütsü nungdaker. Pa lenmang shitak nung lir," ta Ancelotti-isa shisem.

Taküm World Cup nung Brazil team ya Group C nung Morocco, Haiti aser Scotland den ata lir aser parnok mezüngbuba asaya June 13 nü New Jersey nung asayatsü.

Louise Eta Bundesliga nung mezüngbuba tetsür head coach kumogo

Rongchii/April 12, 2026 (Agencies): Union Berlin-i parnok indang head coach melenogo aser iba mapang otsü tasen yangluogo.

Bundesliga club yagi Honibarnü aonung menor sangdong ka ajanga, coach Steffen Baumgart mapa nungi anentsüba sülen assistant coach Marie-Louise Eta season tatem tashi interim head coach ama inyaktü ta metetdakatsüogo.

La iba mapa atema shimba ya alizüing tasen ka tongtetba asütsü, kechiyong arishi kum 32 tain coach ya Bundesliga nung tebur team ka head coach asütsü shimba mezüngbuba tetsür kumogo.

FC Heidenheim goal 3-1 agi makokba sülen Union Berlin puri iba telemtetba ya agia liasü. Taoba asaya trok nung asaya ka dang akokba sülen Berlin nung amendaker aliba club yagi point 32 ngua parnok 11bubai asepzüka luogo aser parnok point table nung bonglangleni ludar.

Eta-i tang mezüngbuba otsü tasen yanglur masü. 2023 kum

November ita la ya league nung mezüngbuba tetsür assistant coach aküm aser 2024 kum January ita coach Nenad Bjelica suspend sütsür aliba mapang la lenisüba nung team-i Darmstadt goal 1-0 agi koka liasü.

Eta ya asaya aliba mapang defensive midfielder ka liasü. La arishi kum 26 asüba mapang asaya nungi anen aser coaching-i meyip aser Werder Bremen youth team tem nung mezüngbuba inyaka liasü.

Asayar ka ama la Turbine Potsdam nungi kanga takok ngua asayaogo aser 2010 kum UEFA Women's Champions League akokba den Bundesliga title aiben benogo. Iba sülen la Germany nung youth team tem balala nung coach mapa inyak aser Frankfurt nung national federation academy nungi la indang pro license agizüka liasü.

Eta ya taoba kum Union Berlin nung aden aser lai shilem balala agiogo, kong U19 team aser tetsür team den inyakba densema lir.

AFI AGM 2026 atema osangbener den sensaksem sentong agitsü

Kohima, Rongchii/April 12 (TYO): Athletics Federation of India (AFI) aser Nagaland Athletics na longjemer Annual General Meeting (AGM) 2026 mamen tsüingda official Press Conference ka agitsü, koba state asoshi alizüing tasen ka tongtetba asütsü.

Osangbenertem den sensaksem sentong ya April 13 nünikongtsütsü 6:30 ako nungi tenzüka Hotel Vivor, Kohima Conference Hall nung agitsü.

Iba sensaksem nung ketdangsür tejentem aser Athletics Federation of India nungi delegate tem aser alima nung athletics fraternity balala den sendaktepa aliba representative temi shilem agitsü, aser parnoki taruba AGM indang metetdaktsütsü.

Iba sentong ya kanga tongtibang lir, kechiyong Nagaland nung tang mezüngbuba National Federation ka indang Annual General Meeting ayongzüka amentsü lir, aser iba ajanga India nung athletic asaya terenlok asoshi state-i taliba shilem agia aoba sayur.

Annual General Meeting 2026 ya April 14 aser 15 nü Kohima nung agitsü, kong linük

kübok tesem balala nungi ketdangsürtem, representative aser stakeholder tem adentsü aser parnoki India nung athletics asaya tarutsü atema sensak asemtsü.

Hotel Vivor, Kohima nung April 14 nü 10 ako nungi tenzüka AGM lapokba sentong agitsü aliba nung osangbenertema arua shilem agitsü pelashishia jaokogo.

AGM lapokba sentong nung Nagaland Chief Minister Dr. Neiphiu Rio tongti tekjaoker asütsü.

Kasa mapang nung tetushi tejaokerji South Asian Athletics Federation tir Dr. Lalit K. Bhanot asütsü.

Osangbenertem den sensaksem sentong aser AGM lapokba sentong ajanga media den sensaksemsü, tongtibang sangdongtem metetdaktsütsü aser national aser regional jenjang nung athletics terenlok atema nükjdongtem metetdaktsütsü asoshi maongka tajung agütsütsü.

Athletics Federation of India aser Nagaland Athletics nati media ajak dang iba sentong nung shilem agia sentong indang osang tejangja abentsü pelashishia jaokogo.

ABC: Shetty-i silver angu; Se-Young-i otsü tasen yanglu



An Se-young

Rongchii/April 12, 2026 (Agencies): Asian Badminton Championships nung Deobarnü tebur kija asaya final nung India nunger asayar Ayush Shetty-i China nunger asayar Shi Yuqi mekoki silver medal nguogo.

Final asaya nung Yuqi-i 8-21, 10-21 agi Shetty madak takok ngua liasü.

Shetty-i taküm iba asayamung ya kanga junga asayaogo aser pai pa dang nungi temaba jenjang nung aliba asayar aika kokogo. Round of 32 nung pai China nunger asayar SF Li 21-13, 21-16 agi akok aser iba sülen

Round of 16 nung Chinese Taipei nunger asayar Y Chi 21-16, 21-12 koka liasü.

Shetty-i maneni kanga junga asaya-a quarterfinal nung Indonesia nunger asayar J Christie 23-21, 21-17 agi straight set nung akok aser semifinal tongteta liasü.

Semifinal nunga arishi kum 20 tain Shetty-i maneni kanga junga asaya aser set asem kanga toktepba asayaba sülen Thailand nunger asayar Kunalvut Vitidsarn 10-21, 21-19, 21-17 agi koka final-i ai, ajisüaka final nungbo pa Yuqi-i straight game nung dang ayong ayonga koka liasü.

Kasa asayamung tetsür kija asaya nung An Se-young-i tetsür badminton asaya nung alizüing tasen ka tongtetogo.

World No. 1 asayar yagi Ningbo nung Badminton Asia Championships final nung Wang Zhiyi 21-12, 17-21, 21-18 agi akokba sülen Career Grand Slam ajangzüketetogo.

Deobarnü takok ya South Korea tsürla asoshi jangrademtsüka liasü, kechiyong lai All England Open final nungbo Wang mekoki liasü.

Career Grand Slam ya ajangzüktsü atema asayar kati Olympics, World Championships, Continental Championships, aser Continental multi-sport asayamung (Asian Games amala) ka akoktsüla.

An Se-young-i asayamung timba koker liasü; lai 2024 kum Paris nung Olympic gold, 2023 kum World Championship gold aser kasa kum Asian Games gold ngur liasü.

Ajisüaka lai Asian Championships ya mekokteti liasü.

Iba asayamung nung lai 2022 kum silver angu aser 2024 kum quarterfinal tonga asaya. 2025 kumbo la yiruba ajanga masayatetba sülen taküm iba asayamung kokogo.

BILEMDANGANG

"Taküm nung takok angutsü atema sentong kabosa alitsüla."